

Na osnovu člana 30. stav (1) tačka e) i stav (2) i član 35. Zakona o plaćama i naknadama u institucijama Bosne i Hercegovine ("Službeni glasnik BiH", br. 50/08 i 35/09), član 50. stav 1. Zakona o radu u institucijama Bosne i Hercegovine ("Službeni glasnik BiH", br. 26/04, 7/05 i 48/05) i član 17. Zakona o Vijeću ministara Bosne i Hercegovine ("Službeni glasnik BiH", br. 30/03, 42/03, 81/06, 76/07, 81/07, 94/07 i 24/08), Vijeće ministara Bosne i Hercegovine na 91. sjednici, održanoj 17. juna 2009. godine, donijelo je

ODLUKU

O NAČINU I POSTUPKU OSTVARIVANJA PRAVA NA NAKNADU ZA PORODILJSKO ODSUSTVO U INSTITUCIJAMA BOSNE I HERCEGOVINE

Član 1. (Predmet Odluke)

Ovom Odlukom uređuje se način i postupak ostvarivanja prava zaposlenih u institucijama Bosne i Hercegovine na naknadu za porodiljsko odsustvo, u skladu sa članom 35. Zakona o plaćama i naknadama u institucijama Bosne i Hercegovine i članom 50. stav 1. Zakona o radu u institucijama Bosne i Hercegovine.

Član 2. (Visina naknade)

- (1) Zaposleni u institucijama Bosne i Hercegovine na porodiljskom odsustvu ima pravo na naknadu skladno propisima koji uređuju ovu oblast prema mjestu uplate doprinosa za svakog zaposlenog u institucijama Bosne i Hercegovine.
- (2) U slučajevima kada entitetskim propisima odnosno propisima Brčko Distrikta Bosne i Hercegovine nisu bliže uređeni uslovi, način, postupak i finansiranje prava na naknadu za porodiljsko odsustvo, obračun i isplata naknade za porodiljsko odsustvo vrši se u visini najniže cijene rada koja je definisana entitetskim općim kolektivnim ugovorima odnosno općim kolektivnim ugovorom Brčko Distrikta Bosne i Hercegovine.

Član 3. (Način dokazivanja porodiljskog odsustva)

- (1) Da bi zaposleni ostvario pravo na naknadu za vrijeme porodiljskog odsustva, potrebno je da dostavi Izvještaj o trajanju privremene spriječenosti za rad izdato od strane nadležne zdravstvene ustanove, a kojim se dokazuje da se isti nalazi na porodiljskom odsustvu.
- (2) Zaposleni je dužan dostaviti Izvještaj iz stava (1) ovog člana, nadležnoj službi budžetskog korisnika, najkasnije do početka obračuna plaće za mjesec u kojem je zaposleni bio na porodiljskom odsustvu.

Član 4. (Obračun i isplata naknade)

Obračun i isplata naknade za porodiljsko odsustvo za zaposlene u institucijama Bosne i Hercegovine vrši se uz mjesečni obračun i isplatu plaća i naknada zaposlenih u institucijama Bosne i Hercegovine na temelju Izvještaja, iz člana 3. stav (1) ove Odluke i rješenja o porodiljskom odsustvu izdatog od strane rukovodioca institucije.

Član 5. (Institucije odgovorne za provođenje Odluke)

Za realizaciju ove Odluke zadužuju se institucije Bosne i Hercegovine i Ministarstvo finansija i trezora.

Član 6.
(Stupanje na snagu)

Odluka stupa na snagu narednog dana od dana objavljivanja u "Službenom glasniku BiH".

VM broj 169/09
17. juna 2009. godine
Sarajevo

Predsjedavajući
Vijeća ministara BiH
Dr. **Nikola Špirić**, s. r.
